

URDHËR
Nr. 247, datë 3.6.2021

**PËR PËRCAKTIMIN E PROCEDURAVE DHE RREGULLAVE TË DËRGIMIT TË
KËRKESËS PËR MBROJTJE NDËRKOMBËTARE NGA AUTORITETI PËRGJEGJËS
PËR KUFIRIN DHE MIGRACIONIN TEK AUTORITETI PËRGJEGJËS PËR AZILIN
DHE REFUGJATËT**

Në mbështetje të pikës 4, të nenit 102, të Kushtetutës së Republikës së Shqipërisë dhe të pikës 8, të nenit 26, të ligjit nr. 10/2021, “Për azilin në Republikën e Shqipërisë”,

URDHËROJ:

1. Autoriteti vendor për kufirin dhe migracionin është autoriteti shtetëror përgjegjës për kryerjen e procedurës së përzgjedhjes dhe regjistrimit të shtetasit të huaj ose personit pa shtetësi, që ka paraqitur kërkesë për mbrojtje ndërkombëtare në pikat e kalimit kufitar ose brenda territorit të Republikës së Shqipërisë.

2. Autoriteti vendor për kufirin dhe migracionin, nëse ka vështirësi në përzgjedhjen e shtetasit të huaj apo personit pa shtetësi që kërkon mbrojtje ndërkombëtare, kërkon praninë dhe asistencën e autoritetit përgjegjës për azilin dhe refugjatët.

3. Në rast se në përfundim të procedurës së përzgjedhjes i huaji klasifikohet si kërkues, autoriteti vendor për kufirin dhe migracionin njofton menjëherë autoritetin përgjegjës për azilin dhe refugjatët, si dhe autoritetin qendror përgjegjës për trajtimin e të huajve.

4. Njoftimi mund të bëhet nëpërmjet këtyre formave të komunikimit:

- a) me telefon zyrtar;
- b) me postë elektronike zyrtare;
- c) me shkresë zyrtare.

5. Autoriteti shtetëror përgjegjës për kufirin dhe migracionin bashkërendon punën për transportin dhe dorëzimin e kërkuesit në Qendrën Kombëtare Pritëse, të caktuar nga autoriteti përgjegjës për azilin dhe refugjatët, kundrejt procesverbalit përkatës, sipas modelit të miratuar me udhëzimin nr. 293, datë 4.6.2015, “Mbi procedurat e trajtimit të shtetasve të huaj me qëndrim të parregullt në territorin e Republikës së Shqipërisë”, i cili mbahet në dy kopje. Një kopje e procesverbalit i jepet punonjësit të Qendrës Pritëse, ndërsa kopja tjetër mbahet nga autoriteti shtetëror përgjegjës rajonal/vendor për kufirin dhe migracionin. Informacioni i mbledhur regjistrohet në rubrikën përkatëse të Regjistrit Kombëtar për të Huajt, nga autoriteti përgjegjës, sipas fushës së përgjegjësisë, në zbatim të udhëzimit nr. 408/2, datë 11.2.2010, “Për ngritjen dhe funksionimin e Regjistrit Elektronik Kombëtar për të Huajt”.

6. Në rast se kërkuesi paraqet drejtpërdrejtë kërkesën për mbrojtje ndërkombëtare, pranë autoritetit përgjegjës për azilin dhe refugjatët, ky i fundit, njofton autoritetin shtetëror përgjegjës për kufirin dhe migracionin, i cili mundëson marrjen e gjurmëve daktiloskopike, si dhe bën regjistrimin e kërkuesit në databazën e azilit.

7. Autoritetit përgjegjës për azilin dhe refugjatët, në çdo rast, i dërgohet një kopje e formularit të gjurmëve daktiloskopike dhe atij të përzgjedhjes, së bashku me një informacion për rastin, brenda 48 orësh nga përfundimi i procedurës së përzgjedhjes, në postën elektronike zyrtare të këtij Autoriteti.

8. Kur gjatë procedurës së përzgjedhjes konstatohen kushtet për ndalimin/arrestimin e kërkuesit për mbrojtje ndërkombëtare, sipas përcaktimeve të legjislacionit në fuqi, autoriteti shtetëror përgjegjës për kufirin dhe migracionin bën ndalimin e tij dhe ndjek procedurat përkatëse ligjore. Në

këto raste njoftohen njëkohësisht autoriteti shtetëror qendror përgjegjës për trajtimin e të huajve dhe autoriteti përgjegjës për azilin dhe refugjatët.

9. Autoritetet përgjegjëse, të përcaktuara në këtë urdhër, që administrojnë të dhëna personale për të huajt që kërkojnë mbrojtje ndërkombëtare në Republikën e Shqipërisë, marrin masat e duhura organizative dhe teknike për mbrojtjen e të dhënave personale nga shkatërrimi, humbja aksidentale, aksesit ose përhapja të persona të paautorizuar, veçanërisht kur përpunimi i këtyre të dhënave kryhet në rrjet, si dhe nga çdo formë tjetër përpunimi të jashtëligjshëm.

10. Urdhri nr. 611, datë 1.12.2015, "Për procedurën dhe rregullat për dërgimin e rastit nga autoriteti përgjegjës për kufirin dhe migracionin tek autoriteti përgjegjës për azilin dhe refugjatët", shfuqizohet.

11. Me zbatimin e këtij urdhri ngarkohen autoritetet përgjegjëse sipas fushave të përgjegjësisë.

Ky urdhër hyn në fuqi menjëherë dhe botohet në Fletoren Zyrtare.

MINISTËR I BRENDSSHËM
Bledar Çuçi